

Schied des ponderis verursacht die krafft des agentis, &c. auß der physis soltestu verstehen/ daß man einem schwachen magen wenig zu dauwen gibt/ einem starcken mehr / vnd also ein jeden was er verzehren kan / also ist hie auch. Im anfang ist dieser sulphur noch zart / der kan gar wenig dauwen. Rechne du es aber auß/ wie viel er könne vbertragen. Es ist nicht allzeit ein gleich pondus der schwärze / auch nicht gleiche stärke. Ist sein viel vnd starck / gib jm nach seiner gelegenheit.

Wen du von der imbibition/ oder nutritio in der kunst auch zu gemeinen stücken/ als wen die chyrurgi sarcocollam nutritam machen/ vnd die Chymici ire sales vnd sulphura mit irem aqua oder liquore imbibiren/ etwas verstehest/ kanstu was hie gesagt wirdt / leicht assequiren.

Die innerliche Hitz/ die nun immer mehr vnd mehr ersticket/ vnd auß der wässerigen feucht emergirt / vnd Luftts Natur bekompt/ wird von der eussern erregt/ aber mit solcher bescheidenheit/ daß nach dem lac virginis von seinem infante eyngetruncken / nicht gezwungen werde es wider zu geben vnd vber sich zu stossen. Du weißt daß der Mercurius flüchtig ist. Er mag leicht erwärmet werden / so gibt er sich in die höhe. Aber das ist wider deine intention/ den du wilt nit scheiden / sondern coaguliren. Da muß das patiens bey dem agente bleiben contactu corporali & mistione per minima, sonst wird keine cōuersio. Wen man nun ordentlich ein theil nach dem andern eyntrencken sol/ lauffen bey 90. tag drauff/ wie auch in der solution. Diese tage werden also natürlich gerechnet / aber es sind etliche artifices also behendt mit iren præparationibus, daß sie darauff nicht sehen/ vnd haltens für kein edictum prætorium. Nennens schlecht seinen menssem, er hab wenig oder viel tag. Es lehret sie aber der motus materiae/ wie streng sie fort fahren sollen. Zehet das Kind seine Milch bald auff/ vnd wirdt bald wider durstig/ muß du es bald wider speisen. Diese speise wirdt in die substanz des nutriti verwandelt / vnd wil hinfort auch gespeiset seyn: vnd wie ein Knab mehr bedarff den ein Wochenkind/ vnd immer eins frässiger ist denn das ander: also gehet hie auch zu/ wirst derhalben wol sehen / in wie viel tagen sich schicken wil/ vnd gar auff coaguliren.